

四庫全書

子部

欽定四庫全書

子部

神農本草經疏卷

二十七至
三十

詳校官太醫院吏目臣周世泰

編修臣倉聖脈覆勛

總校官進士臣繆琪

校對官中書臣孫溶

謄錄監生臣陶鏗

欽定四庫全書

神農本草經疏卷二十七

明 繆希雍 撰

總三十種今疏其要者八種

胡荽

瓜蒂

白冬瓜

白芥

芥

萊菔

苦菜

苜蓿

胡荽味辛溫

一云微寒

微毒消穀治五藏補不足利大小腸

通小腹氣拔四肌熱止頭痛療沙癬豌豆瘡不出作酒
散之立出通心竅

疏○胡荽稟金氣多火氣少故味辛香氣溫微毒入
足太陰陽明經辛香走竅而入脾故主消穀利大小
腸通少腹氣脾胃為邪熱所干則頭痛四肢熱辛溫
發散二經之邪則頭痛四肢熱自拔沙癬痘瘡出不
快者外為風寒所侵或穢氣所觸也辛溫祛風寒香
竅辟穢氣則腠理通暢而痧癘痘瘡皆出矣通心竅

治五臟補不足者總言其辛香內通心脾外達腸胃除一切不正之氣則真氣安和斯有補益之道耳子亦能發痘癩殺魚腥

主治參互

經驗後方癩痘出不快用胡荽二兩切以酒二大盞煎沸沃之以物蓋定勿令洩氣候冷去滓微微含噴從項背至足令遍勿喫頭面子母祕錄肛門脫出胡荽一升切燒烟熏之即入外臺祕要牙齒疼痛

胡荽子五升水五升煮取一升含嗽

簡誤

胡荽辛香發散氣虛人不宜食癰疽出不快非風寒
外侵及穢惡之氣觸犯者不宜用孟詵云多食損人
精神華陀云胡臭口臭鬩齒脚氣皆不可食令病加
甚陳藏器云久食令人多忘發腋臭根發痼疾凡服
一切補藥及藥中有白朮牡丹者咸忌之

瓜蒂味苦寒有毒主大水身面四肢浮腫下水殺蠱毒

欬逆上氣及食諸果病在胸腹中皆吐下之去鼻中息
肉療黃疸

疏○瓜蒂感時令之火熱稟地中之伏陰故其味苦
氣寒有小毒氣薄味厚浮而升陰多於陽酸苦湧泄
為陰故也入手太陰足陽明足太陰經其主大水身
面四肢浮腫黃疸者皆脾胃虛水氣溼熱乘虛而容
之也苦以湧泄使水溼之氣外散故能主之經曰在
高者因而越之病在胸膈則氣不得歸元而為欬逆

上氣吐出胸中之邪則氣自順欬逆止矣殺蠱毒者亦取吐出之義去鼻中息肉者以其苦寒能除肺家之熱也日華子治腦塞熱艱眼昏吐痰好古得麝香細辛治鼻不聞香臭及吐風熱痰涎風眩頭痛癩瘡喉痺頭面有溼氣傷寒客水胸中傷食脹滿下部無脉等證皆借其宣發湧泄引涎追淚之功耳

主治參互

仲景傷寒論病如桂枝證頭不痛項不强寸脉微浮

胸中痞鞭氣上衝咽喉不得息者此胸中有寒也當吐之宜瓜蒂散用瓜蒂赤小豆等分為散取一錢以香豉一合用熱湯七合煮作稀糜去滓取汁和散頓服之不吐少少加得快吐乃止 溼家病身上疼痛發熱面黃而喘頭痛鼻塞而煩其脉大自能飲食腹中和無病病在頭中寒溼故鼻塞內藥鼻中則愈瓜蒂散主之 太陽中暈身熱疼重而脉微弱此因夏月傷冷水行皮中所致宜吐之瓜蒂散 病胸上

諸實胸中鬱鬱而痛不能食欲使人按之而反有涎唾下利日十餘行其脉反微寸口脉微滑此可吐之吐之則利自止 宿食在上脘者當吐之 病人手足厥冷脈乍結以客氣在胸中心下滿而煩欲食不能食者當吐之 懊憹煩躁不得眠未經汗下者謂之實煩當吐之已上悉用瓜蒂散皆仲景法 東垣曰難經云上部有脉下部無脉其人當吐不吐者死此飲食內傷填塞胸中食傷太陰則風木生發之氣伏

于下宜瓜蒂散吐之內經所謂木鬱達之也吐去上
焦有形之物則木得舒暢天地交而萬物通矣諸亡
血家不可與瓜蒂散 寇氏衍義風涎暴作氣塞倒
仆用瓜蒂末二錢膩粉一錢七以水半合調灌良久
涎自出不出含沙糖一塊下咽即涎出也 千金翼
熱病發黃瓜蒂為末以大豆許吹鼻中取出黃水乃
愈 孟詵食療陰黃黃疸取瓜蒂丁香赤小豆各七
枚為末吹豆許鼻中少時黃水流出一日用瘥乃

止并治身面浮腫 活人書濕家頭痛瓜蒂末一字
嚙入鼻中口含冷水取出黃水愈 聖惠方鼻中息
肉瓜蒂末白礬末各半錢綿裹塞之或以豬脂和挺
子塞之日一換

簡誤

瓜蒂極苦而性上湧能損胃傷血耗氣損神凡胸中
無寒胃家無食皮中無水頭面無濕及胃虛氣弱諸
亡血諸產后似中風倒仆心虛有熱癩瘡女勞穀疸

元氣疴羸脾虛浮腫切勿誤用誤用則為害非細傷
生不淺戒之慎之

白冬瓜味甘微寒主除小腹水脹利小便止渴

疏○白冬瓜內稟陰土之氣外受霜露之侵故其味
甘氣微寒而性冷利無毒水屬陰瓜性亦屬陰氣類
相從故能利小便除小腹水脹也甘寒解胃中之熱
故又能止渴也弘景止消渴煩悶解毒孟詵益氣耐
老除心胸滿去頭面熱大明消熱毒癰腫切片摩癩

子蘓頌利大小腸壓丹石毒皆得其旨者也

主治參互

孟詵食療積熱消渴白冬瓜去皮每食後嚼二三兩
五七度良 古今錄驗產後痢渴久病津液枯竭四
肢浮腫口舌乾燥用冬瓜一枚黃土泥厚五寸煨熟
絞汁飲良亦治傷寒痢渴 楊氏家藏方十種水氣
浮腫喘滿用大冬瓜一枚切蓋去瓢以赤小豆填滿
蓋合簽定以紙筋泥固濟日乾用糯糠兩大籬入瓜

在內煨至火盡取出切片同赤豆焙乾為末水糊丸
梧子大每服七十九煎冬瓜子湯下日三服小便利
為度 冬瓜仁味甘寒能開胃醒脾同橘紅石斛竹
茹枇杷葉白芍藥蘆根汁人參白茯苓治胃虛嘔吐
同人參茯苓神竹瀝白茯苓黃耆甘草白芍藥酸棗
仁治小兒慢脾風

簡誤

冬瓜性冷利凡臟腑有熱者宜之若虛寒腎冷久病

滑洩者不得食未經霜者不宜多食九月後食之乃

佳

白芥味辛溫無毒主冷氣色白甚辛美子主射攻及
疰氣上氣發汗胸膈痰冷面黃

疏○芥稟火金之氣以生而白芥則又得金氣之勝
故味辛氣溫無毒辛溫入肺而發散故有溫中除冷
發汗辟邪豁痰利氣之功朱震亨云痰在膈下及皮
裏膜外非白芥子莫能達古方控涎丹用之正此義

兩

主治參互

韓悉醫通云凡老人苦于痰氣喘嗽胸滿懶食不可
妄投燥利之藥反耗真氣因有人求治其親遂制三
子養親湯治之隨試隨效用白芥子紫蘇子白萊菔
子各微炒研破看所主為君每劑不過三四錢用絹
袋盛入湯煮飲之勿煎太過則味苦辣若大便素實
者入蜜一匙冬月加薑一片 蘇恭主痰氣發無常

處及射攻毒以芥子丸服之或搗末醋和塗之隨手
有驗

簡誤

白芥子味極辛氣溫能搜剔內外痰結及胸膈寒痰
冷涎壅者殊効然而肺經有熱與夫陰火虛炎咳嗽
生痰者法在所忌其莖葉煮食動風動氣有瘡瘍
痔疾便血者咸忌之

芥味辛溫無毒歸鼻主除腎邪氣利九竅明目安中

久食温中

疏○芥所稟與白芥同今人以醋椒同芥心作辣齏食之則腦額酸楚淚涕俱出即歸鼻利竅明耳目之驗也辛温能利氣消痰開胃辟寒故主安中及久食温中也其主除腎邪氣者辛能潤腎温能煖水臟故也子功用與白芥子相同力稍不逮

主治參互

治肺癰用百年芥菜鹵久窖地中者飲數匙立効其

義以芥菜辛溫得鹽水久窖之氣變為辛寒辛寒能散痰熱芥菜主通肺氣所以治肺癰真良法也

簡誤

與白芥子同其主利九竅明目者蓋言辛散走竅豁痰引涎暫用一時使邪去而正自復非謂其真能利竅明目也用者詳之

萊菔音菔根味辛甘溫無毒散服及炮煮服食大下氣消

穀去痰癖肥健人生搗汁服主消渴試大有驗

疏○萊菔根稟土金之氣以生本經味辛甘氣溫無
毒蓋說云性冷大明云平詳其功用應是生者味辛
性冷熟者味甘溫平故本經下氣消穀去痰癖肥健
人及溫中補不足寬胸膈利大小便化痰消導者煮
熟之用也止消渴制麩毒行風氣去邪熱氣治肺痿
吐血肺熱痰嗽下痢者生食之用也大抵入手足太
陰手足陽明經故所主皆脾肺腸胃之病 子味辛
過于根生研汁服吐風痰同醋研消腫毒炒熟下氣

定喘消食除脹止氣痛以其性辛甚故升降之功亦
烈于根也朱震亨云萊菔子治痰有推牆倒壁之功
是矣

主治參互

醫學集成勦喘痰促遇厚味即發者用蔔子淘淨蒸
熟晒研薑汁浸蒸餅丸菜豆大每服三十九以口津
嚥下日三服 治年遠脾泄百藥不効單煮白菜終
日啖之不輟必瘥

簡誤

萊菔根葉皆可食生熟皆宜乃蔬中之至賤而能止渴充飢者歎歲農人種之最有益但性專下氣復能耗血故多食則髭髮早白服地黃何首烏者不可食子消痰下氣更速凡虛弱人忌之

苦菜味苦寒無毒主五藏邪氣厭

伏也穀胃痺腸辟渴熱

中疾惡瘡久服安心益氣聰察少臥輕身耐老耐饑寒高氣不老

疏○苦菜與苦苣苦蕒一物而形稍異功用則相同也稟天地之陰氣故其味苦氣寒無毒入心脾胃三經其主五臟邪氣者邪熱客于心也胃痺渴熱中疾者熱在胃也腸澼者熱在大腸也惡瘡者熱瘀傷血也苦寒總除諸熱故主之也熱去則神自清故久服安心益氣聰察少卧也輕身耐老耐飢寒高氣不老者總言其熱退陰生安心益氣之極功也

主治參互

寇宗奭衍義治疔瘡以苦苣搗汁傅之殊驗青苗葉
陰乾以備冬月需用為末水調傅之 唐珣經驗方
對口惡瘡野苦苣搗汁一鍾入姜汁一匙和酒服以
渣傅一二次即愈 肘後方中沙虱毒沙虱在水中
人洗浴則着人身鑽入皮裏初得皮上正赤如小豆
黍粟摩之痛如刺三日後發寒熱發瘡毒若入骨殺
人嶺南多此即以茅葉刮去以苦菜汁塗之佳

簡誤

脾胃虛寒者忌之

首蓐味甘平無毒主安中利人可久食

疏○首蓐草也嫩時可食處處田野中有之陝隴人亦有種者木經云苦平無毒主安中利人可久食然性頗涼多食動冷氣不益人根苦寒主熱病煩滿目黃赤小便黃酒疸搗汁一升服令人吐利即愈其性苦寒大能泄濕熱故耳以其葉煎汁多服專治酒疸大効

神農本草經疏卷二十七

欽定四庫全書

神農本草經疏卷二十八

明 繆希雍 撰

總一十三種今疏其要者六種移四種入草部中
品

蔥白

韭菜

蔥白辛平可作湯主傷寒寒熱出汗中風面目腫傷寒
骨肉痛喉痺不通安胎歸目除肝邪氣安中利五臟益

目睛殺百藥毒 葱實味辛溫無毒主明目補中不足

蔥根主傷寒頭痛 蔥汁平溫主溺血解藜蘆毒弘景

云蔥有寒熱白冷青熱
傷寒湯中不用青也

疏○蔥稟天之陽氣得地之金味中空象肺其味辛

平平即涼也而性無毒氣厚味薄升也陽也入手太

陰足厥陰足陽明經辛能發散能解肌能通上下陽

氣故外來怫鬱諸證悉皆主之傷寒寒熱邪氣并也

中風面目腫風熱鬱也傷寒骨肉痛邪始中也喉痺

不通君相二火上乘于肺也辛涼發散得汗則火自散而喉痺通也肝開竅于目散肝中邪熱故云歸目除肝邪氣邪氣散則正氣通血自和調而有安胎安中利五藏之功矣其曰益目睛殺百藥毒者則是辛潤利竅而兼解散通氣之力也

主治參互

活人書治傷寒頭痛如破連鬚葱白半斤生薑二兩水煎溫服 濟生秘覽時疾頭痛發熱者以連根葱

白二十根和米煮粥入醋少許熟食取汗即解數種
傷寒一二日初起不能分別者亦用之取汗 風濕

身痛用生葱搗爛入香油數點水煎調川芎鬱金末

一錢服取吐 楊氏產乳六月孕動困篤難救者葱

白一大握水三升煎一升去滓頓服 深師方胎動

下血病痛搶心用葱白煮濃汁飲之未死即安已死

即出未効再服一方加川芎 陰毒腹痛厥逆唇青

卵縮六脉欲絕者用葱一束去根及青留白二寸烘

熱安臍上以熨斗火熨之葱壞則易良久熱氣透入
手足溫有汗即瘥乃服四逆湯若熨而手足不溫不
可治 華陀救卒病方脫陽危證凡人大吐大泄之
後四肢厥冷不省人事或與女子交後少腹堅痛外
腎搐縮冷汗出厥逆須臾不救先以葱白炒熟熨臍
後以葱白三七莖搗爛用酒煮灌之陽氣即回加入
參為要 本事方小便閉脹不治殺人葱白三斤剉
炒帕盛二個更互熨小腹氣透即通 劉禹錫傳信

方打撲損見血取葱新折者塘火煨熟剝皮其間有
涕便將罨損處仍多煨續續易熱者立愈 張氏經
驗方金瘡折傷出血用葱白連葉煨熱或鍋烙炒熱
搗爛傅之冷即再易神驗

簡誤

病人表虛易汗者勿食病已得汗勿再進

韭味辛微酸溫無毒歸心安五臟除胃中熱利病人可
久食

疏○韭稟春初之氣而生兼得金水木之性故其味
辛微酸氣溫而無毒生則辛而行血熟則甘而補中
益肝散滯導瘀是其性也以其微酸故入肝而主血
分辛溫能散結凡血之凝滯者皆能行之是血中行
氣藥也心主血專理血分故曰歸心五藏之結滯去
則氣血條暢而自安矣胃中熱乃胃中有瘀滯而發
熱也瘀血行熱自除矣病人之氣抑鬱者多凡人氣
血惟利通和韭性行而能補故可久食 韭子味辛

甘溫無毒主夢中洩精溺血蓋韭乃入足厥陰少陰
經腎主閉藏肝主疏洩素問云足厥陰病則遺尿思
想無窮入房太甚發為筋痿及為白淫韭子入厥陰
而甘溫補肝及命門之不足故主洩精溺血

主治參互

有一貧叟病噎膈食入即吐胸中刺痛或令取韭汁
入鹽梅鹵汁少許細呷得入漸加忽吐稠涎數升而
愈此亦仲景治胸痺痛用薤白皆取辛溫能散胃脘

痰飲惡血之義也 一人臘月飲酒三盃自後食必
屈曲下膈硬瀆微痛右脉甚瀆關脉沉此瘀血在胃
腕之口氣因鬱而成痰隘塞食道也以韭汁半盞細
細冷呷盡半斤而愈 食療本草胸痺急痛如錐刺
不得俛仰自汗出或徹背上不治或至死取生韭及
根五斤洗搗汁服之瘥 金匱要略風忤邪惡韭根
一把烏梅十四個吳茱萸炒半升水一斗煮之仍以
病人櫛內入煮三沸櫛浮者生沉者死煮至三升分

三服。千金方刺傷中水腫痛，煮韭熱搗之。

簡誤

韭性辛溫通利，雖曰補益，然多食能令人神昏，最為養性所忌。胃氣虛而有熱者，勿服韭。黃耆出于土者，勿服，食之滯氣，以其氣尚抑鬱未申故也。花食之亦動風。

神農本草經疏卷二十八

欽定四庫全書

神農本草經疏卷二十九

明 繆希雍 撰

總二十二種今疏其要者四種

葫

馬齒莧

茄子 根附

蕞

葫 也 味辛溫有毒主散癰腫蠱瘡除風邪殺毒氣獨子

者亦佳歸五藏久食傷人損目明

疏○葫大蒜也稟火金之氣以生故其味辛氣溫辛
溫太甚故其性有毒熏臭異常不宜多食入足陽明
太陰厥陰經辛溫能辟惡散邪故主除風邪殺毒氣
及外治散癰腫蠱瘡也辛溫走竄無處不到故主歸
五藏脾胃之氣最喜芳香熏臭損神耗氣故久食則
傷人肝開竅於目目得血而能視辛溫太過則血耗
而目損矣總之其功長於通達走竅去寒濕辟邪惡
散癰腫化積聚煖脾胃行諸氣故蘓恭主下氣消穀

化肉藏器主風濕破冷氣爛瘡癰伏邪惡宣通溫補
日華子主健脾胃治腎氣止霍亂轉筋腹痛除邪祟
解溫疫等用也

主治參互

外臺秘要關格脹滿大小便不通獨頭蒜燒熟去皮
綿裹納下部氣立通 又方治金瘡中風角弓反張
取蒜一大升破去心無灰酒四升煮令極爛并滓服
一大升須臾得汗則瘥 簡要濟衆治鼻血不止服

藥不應用蒜一枚去皮細研如泥攤一餅子如錢大
厚一豆許左鼻血出貼左腳心右鼻血出貼右腳心
兩鼻俱出皆貼之立瘥血止急以溫水洗腳心 外
科精要背瘡灸法凡覺背上腫硬疼痛以濕紙貼尋
瘡頭用大蒜十顆淡豆豉半合乳香一錢細研勻隨
瘡頭大小用竹片竹圈圈定填藥於內二分厚著艾
灸之痛灸至痒灸至痛以百壯為率効 永類鈐
方乾濕霍亂轉筋用大蒜搗塗足心立愈 普濟方

寒瘧冷痢端午日以獨頭蒜十箇黃丹二錢搗丸梧
子大每服九丸長流水下妙 衍義暴下血病用葫
五七枚去皮研膏入豆豉搗丸梧子大每米飲下五
六十九無不愈者 華佗行道見車載一人病咽塞
食不下呻吟佗視曰餅店家蒜齏大酢三升飲之當
自痊果吐大蛇一枚而愈

簡誤

蒜性溫屬火氣味臭烈凡肺胃有熱肝腎有火氣虛

血弱之人切勿沾唇雖有煖脾胃祛寒濕之功亦宜
暫用切勿過施過則生痰動火傷神散氣損目耗血
切戒切戒

馬齒莧主目盲白翳利大小便去寒熱殺諸蟲止渴破
癥結癰瘡服之長年不白和梳垢封疔腫又燒為灰和
多年醋滓先灸疔腫以封之即根出生搗絞汁服當下
惡物去白蟲煎為膏塗白禿又主三十六種風結瘡以
一釜煮澄清內蠟三兩重煎成膏塗瘡上亦服之

疏○馬齒莧稟天之陰寒兼得地中之金氣以生故
葉節間有水銀以其得金氣多也味應辛苦氣寒無
毒經云榮氣不從逆於肉裏乃生癰腫原病式云諸
痛痒瘡瘍皆屬心火辛寒能涼血散熱故主癥結癰
瘡疔腫白禿及三十六種風結瘡搗敷則腫散疔根
拔絞汁服則惡物當下內外施之皆得也辛寒通利
故寒熱去大小便利也苦能殺蟲寒能除熱故主殺
諸蟲去寸白止渴辛寒能散肺家之熱故主目盲白

醫也長年不白總言其涼血益血病去身輕之功耳
方士多采取用以其亦有代砂結汞之能也

主治參互

崔元亮治赤白下不問老幼孕婦悉可服取馬齒莧
搗絞汁三大合和雞子白一枚微溫頓服之不過再
作則愈 又方療多年惡瘡百方不瘥或痛焮走不
已者竝爛搗馬齒莧敷上不過三兩遍即愈 廣利
方小兒火丹熱如火透臍即損人馬齒莧搗塗之

崔元亮方疔瘡腫毒馬齒莧二分石灰三分為末雞
子白和傅之

簡誤

馬齒莧辛寒滑利凡脾胃虛寒腸滑作泄者勿用煎
餌方中不得與鼈甲同入令化作小鼈傷人也

茄子味甘寒久冷人不可多食損人動氣發瘡及痼疾
根及枯莖葉主凍脚瘡可煮作湯漬之良

疏○茄內稟地中一陰之氣外受南方熱火之陽故

其花實皆紫本經雖云甘寒必是濕中有火使非濕
熱則不能動氣發瘡及痼疾也濕勝則久冷人多食
有損熱勝故能主凍脚瘡也孟詵云主寒熱五藏勞
大明治溫疾傳尸勞氣皆非正治惟腫毒家用之為
當耳

主治參互

靈苑方腸風下血經霜茄連蒂燒存性為末每日空
心溫酒服二錢匕 丹溪方治乳頭裂用茄子老黃

者燒灰傅之 鮮茄蒂鮮何首烏等分煮飲治對口
瘡有神 茄桿燒灰淋汁和入桑礪城等藥諸癰腫
疔瘡有效

簡誤

茄觀本經所說止是損人竝無利益後人雖有處治
之法然終與本經相失凡有痼疾及虛冷人切不可
食近世為茹菜中常用之物尊生者當慎之

戢味辛微温主蠹螬溺瘡多食令人氣喘

俗呼魚腥草

疏 戴生於下濕之地得陰中之陽故其味辛氣溫
入手太陰經能治痰熱壅肺發為肺癰吐膿血之要
藥辛溫主散故能治蠹蝮溺瘡肺主氣辛溫能散氣
故多食令人氣喘肺與大腸為表裏大腸濕熱盛則
為痔瘡得辛溫之氣則大腸清寧故又為痔瘡必須
之藥

主治參互

單用搗汁入年久芥菜酒飲之治肺癰有神 救急

方痔瘡腫痛魚腥草一握煎湯熏洗仍以滓傅即愈
簡誤

戢止能消肺癰治痔瘡餘非所長况多食令人氣喘
發虛弱損陽氣發脚氣等害慎之慎之

神農本草經疏卷二十九

欽定四庫全書

神農本草經疏卷三十

明 繆希雍 撰

補遺

玉石部

黃土

蚯蚓泥

糞坑底泥

烏爹泥

煙膠

石鹼

銀朱

爐甘石

方諸水

木部

木芙蓉

山茶花

木綿子

肥皂莢

大風子

樟腦

蛀竹屑

人部

人氣

獸部

黃明膠

霞天膏

狗寶

山獺陰莖

羊脛骨

蟲魚部

鰕魚膽

米穀部

亞麻

粟殼

罌子粟

阿芙蓉

菜豆粉

豌豆

蠶豆

豇豆

刀豆子

紅麴

玉石部

黃土味甘平無毒主洩痢冷熱赤白腹中熱毒絞結痛下血取入地乾土以水煮三五沸絞去滓煖服一二升

又解諸藥毒中肉毒合口椒毒野菌毒

張司空云三尺以上曰糞三尺

以下曰土凡用當去上惡物勿令入容水

疏○土為萬物之母黃乃中央正色在人臟腑則脾胃應之故萬物非土不生人身五臟六腑非脾胃無以養是以黃土入藥治洩痢冷熱赤白腹中熱毒絞

結痛者取其補助戊己之功也味甘而氣和故能安和脾胃止下血及解百毒如經所言也

主治參互

小兒秘訣烏沙驚風遍身都黑者急推向下將黃土一盞搗末入酢一鍾炒熱包定熨之引下至足刺破為妙 氣味和平與物無迕故不著簡誤

蚯蚓泥即蚯蚓屎也味甘氣寒無毒赤白久熱痢取一升炒烟盡沃汁半升濾淨飲之蓋久痢乃濕熱甚於腸

胃得甘寒之氣則濕熱自除矣日華子主小兒陰囊忽
虛熱腫痛以生甘草汁入輕粉末調塗之以鹽研傅瘡
去熱毒及蛇犬傷蘇恭主傳狂犬傷出犬毛者神效皆
取甘寒除熱解毒之力耳

主治參互

外臺秘要一切丹毒水和蚯蚓泥傅之 丹溪方時
行腮腫栢葉汁調蚯蚓泥塗之 摘玄方燕窩生瘡
韭地蚰蟻屎米汁水和煨過入百草霜等分研末香

油調塗之 又方治下部楊梅結毒韭地上蚯蚓泥
硫黃等分研勻用泥封固作團煨過取出研細生桐

油調搽

簡誤

虛寒滑利不宜用

糞坑底泥大寒無毒治發背諸惡瘡陰乾為末新水調
傅其痛立止聖濟總錄治疔腫糞下土蟬蛻全蠍等分
搗作錢大餅香油煎滾溫服以滓傅瘡四圍疔自出也

今人以熟糞盛核桃殼內覆疔腫上云疔根即爛出即此意也

烏爹泥味苦澆平無毒主清上膈熱化痰生津塗金瘡一切諸瘡生肌定痛止血收濕一名孩兒茶

出南番瓜哇暹羅諸

國今雲南老撾暮雲場地方造之云是細茶末入竹筒中堅塞兩頭埋烏泥溝中日久取出搗汁熬製而成其塊小而潤澤者為上大而焦枯者次之

疏○烏爹泥本是茶末又得土中之陰氣其味苦澆氣應作寒性無毒其主清上膈熱化痰生津者茶之

用也得地中之陰氣能涼血清熱故主金瘡止血及一切諸瘡生肌定痛也若能燥瀉能斂故又主收濕氣

主治參互

積德堂方牙疳口瘡孩兒茶礪砂等分為末搽之

纂竒方下疳陰瘡孩兒茶一錢珍珠一分片腦半分為末傅之 董炳方脫肛氣熱孩兒茶二分熊膽五分片腦一分為末人乳調搽肛上熱汁自下而肛收

也亦治痔瘡 今人多用外治內服甚少故不著簡

誤

煙膠味辛苦氣微溫辛能散風苦能燥濕殺蟲故主頭
瘡白禿疥瘡風癬痒痛流水取梢牛皮竈岸煙膏為末

麻油調塗或入輕粉少許

此即熏梢牛皮
竈上黑土也

石鹼味辛苦瀉氣溫微毒性能除垢膩磨積塊過服能
損人同石灰桑礪透肌肉潰癰瘰癧去瘀肉點痣壓疣
贅今人用以澣衣

出山東濟寧大同諸處彼人採蒿蓼
之屬開窖浸水漉起晒乾燒灰以原

水淋汁每百斤入粉麵一二斤則凝定如石連汁貨之

簡誤

鹼乃軟堅消積之物食之使人泄瀉以其陰濕之性潤下軟堅透肉故於腸胃非宜作泄胃薄者忌之

銀硃乃硫黃同汞升鍊而成其性燥烈過服能使人齟爛筋攣其味辛氣溫有毒亦能破積滯散結療癰疥惡瘡殺蟲不宜服食今人多以黃丹礬紅雜之不堪用

主治參互

李樓怪症方火焰丹毒銀硃調雞子清塗之 多能

鄙事湯火灼傷銀硃研細菜油調敷 應急良方日

久頑瘡不收者銀硃一錢地龍骨即年久石灰五分松香

五錢為末香油一兩化攤紙上貼之兼能治濕毒臙

瘡

爐甘石味甘溫無毒主止血消腫毒生肌明目去翳退赤收濕除爛同龍腦點治目中一切病

疏○爐甘石受金氣而結味應甘辛氣溫無毒其性

帶澀經曰榮氣不從逆於肉裏乃生癰腫甘溫能通暢血脈則腫痛散血自止肌肉生也又目得血而能視風熱上壅則目為赤爛膚腎甘入脾而益血辛溫能散風熱性澀則能粘物故同除腎藥點目翳及治目中一切病也

主治參互

一切目疾真爐甘石半斤用黃連四兩剉碎入銀石器內水二盃煮二伏時去黃連以甘石為末入龍腦

香二錢半研勻罐收每點少許頻用取效 邵真人
方下疳陰瘡爐甘石煨醋淬七次一兩孩兒茶三錢
為末麻油調傅立效

方諸水味甘寒無毒主明目定心去小兒熱煩止渴

方諸大蚌也向月取之得二三合水亦如朝露又名
明水得至陰之精華故能明目定心及止渴除煩熱
也又為丹竈家所須

木部

木芙蓉

稟夏末秋初之氣故其味辛辛屬金化故能清肺其
氣平平即涼也故能涼血散熱解毒兼治一切癰疽
腫毒惡瘡排膿止痛小兒疳積

主治參互

簡便方癰疽腫毒重陽前取芙蓉葉研末端午前取
蒼耳燒存性研末等分蜜水調塗四圍其毒自不走
散名鐵井欄他用甚稀故不著簡誤

山茶花

得一陽之氣以生故其花開於冬末春初之時其味甘而微辛氣平而微寒色赤而入血分故主吐血衄血腸風下血並為末入童溺及酒調服

木綿子

得地中之陽氣復感秋金之氣以成其味辛其氣熱其性有毒入肝入腎祛風濕寒濕之藥也惟其辛故能散風邪惟其熱故能除寒濕凡下部有風寒濕邪

者宜之然而性熱有毒肝腎虛者不宜用一切陰虛火熾痿弱下體無力者咸忌之

肥皂核

生於盛夏六陽之令而成於秋金之月得火金之氣故其味辛氣溫有毒凡腸胃有垢膩穢惡之氣鬱於中則外生瘰癧惡瘡腫毒泄於外則為腸風下痢膿血此藥專能盪滌垢膩宣通穢積腸胃潔淨則諸證自除也

主治參互

秘方治瘰癧用肥皂去核入蟹螯在內紮緊蒸去蟹螯加入貝母天花粉玄參甘草牛旁子連翹為丸每服一錢白湯下服後腹疼勿慮此藥力追毒之故

獨核仁同猪胰子金銀花皂角刺芭蕉根雪裏紅五加皮土茯苓皂莢子白殭蠶木瓜蟬蜋白蘚皮治癩瘡久虛者加入參黃耆薏苡仁兼治結毒 普濟方腸風下血獨子肥皂燒存性一片為末糊丸米飲下

又方治臘梨頭瘡用獨核肥皂去核填入沙糖入
巴豆二枚紮定鹽泥固煨存性再入檳榔輕粉六七
分研勻香油調搽先以湯洗淨拭乾乃搽一宿見效
除瘡毒外無他用故不著簡誤

大風子

稟火金之氣以生故其味辛苦氣熱有毒辛能散風
苦能殺蟲燥濕溫熱能通行經絡世人用以治大風
癘疾及風癬疥癩諸瘡悉此意耳然性熱而燥傷血

損陰不宜多服用之外治其功不可備述也

樟腦

得純陽之氣其味辛其氣熱初時以水煎成後得火則焰熾不息其稟龍火之性者乎氣亦香竈能通利關竅逐中惡邪氣復能去濕殺蟲凡一切疥癬風瘙濕毒瘡瘍等證皆所須用

蛀竹屑

年久枯竹中蠹屑也竹之餘氣尚存其氣味必甘平

無毒甘能解毒平則兼散故可用為蝕膿長肉之藥也

主治參互

同象牙末真珠白礬等藥能消漏管方見象牙條下
朱氏集驗方耳出臭膿用蛀竹屑臙脂胚子等分
麝香少許為末吹之 普濟方耳膿作痛因水入耳

中者蛀竹屑一錢臙粉一錢麝香五分為末以綿杖
絞淨送藥入耳以綿塞定有惡物放令流出甚者三

度必愈 又方濕毒臙瘡蛙竹屑黃檗末等分先以
葱椒茶湯洗淨搽之日一次效 外臺秘要湯火灼
瘡蛙竹屑末傅之愈

人部

人氣

主下元虛冷日令童男女以時隔衣進氣臍中及兩
腰腎間甚良凡人身體骨節痺痛令人更互呵熨久
久經絡通透蓋氣屬陽為一身之健運即真火也天

非此火不能生物人非此火不能有生故老人虛人
與二七以前少陰同寢藉其熏蒸最為有益下元虛
冷火氣衰也得外入之少火乃所以補其不足骨節
疼痺血泣不行也血不自行隨氣而行故能使骨節
通暢也近時術士令童女以氣進入鼻竅臍中精門
以通三田謂之接補此亦小法不得其道者反以致
疾

獸部

黃明膠味甘平無毒主諸吐血下血血淋妊婦胎動下血風濕走注疼痛打撲傷損湯火灼瘡一切癰疽腫毒

活血止痛

即牛皮膠

按本經白膠一名鹿角膠煮鹿角作之阿膠一名傅致膠煮牛皮或驢皮作之其說甚明黃明膠即今水膠乃牛皮所作其色黃明非白膠也亦非阿井水所作甄權以黃明為鹿角白膠唐慎微又採黃明諸方附於白膠後並誤矣其氣味與阿膠同故其所主亦

與阿膠相似以非阿井水及驢皮同造故不能疎利
下行以其性味皆平補亦宜於血虛有熱者若鹿角
膠則性味溫補非虛熱者所宜不可不詳辨也

主治參互

蘭氏方跌撲損傷真牛皮膠一兩乾冬瓜皮一兩剉
同炒存性研末每服五錢熱酒一鍾調服仍飲酒二
三盞煖卧微汗痛止 本事方諸般癰腫黃明膠一
兩水半升化開入黃丹一兩煮勻以鵝翎掃上瘡口

如未成者塗其四圍自消 阮氏經驗方背疽初起
用黃明牛皮膠四兩入酒重湯頓化隨意飲盡不能
飲者滾白湯飲之服此毒不內攻一方加穿山甲四
片炒成末其妙無比

霞天膏味甘溫無毒主中風偏廢口眼歪斜痰涎壅塞
五臟六腑留痰宿飲癱塊手足皮膚中痰核其法用肥
嫩雄黃牛肉三四十斤洗極淨水煮成糜濾去滓再熬
成膏用

疏○胃屬土為水穀之海無物不受胃病則水穀不能以時運化羈留而為痰飲壅塞經絡則為積痰老痰結痰等證陰虛內熱生痰則為偏廢口眼歪斜留滯腸胃則為宿飲癖塊隨氣上湧則為喘急迷悶流注肌肉則為結核王隱君論人之諸疾悉由於痰然而痰之所生總由於脾胃虛不能運化所致惟用霞天膏以治諸痰證者蓋牛土畜也黃土色也肉者胃之味也熬而為液雖有形而無濁質也以脾胃所主

之物治脾胃所生之病故能由腸胃而滲透肌膚毛
竅搜剔一切留結也陰虛內熱之人往往多痰此則
由於水涸火熾煎熬津液凝結為痰膠固難散者亦
須以此和竹瀝貝母橘紅蘇子枯樓根枸骨葉之類
消之或以橘皮白茯苓蘇子白豆蔻仁半夏蒼朮為
麴治脾胃積痰或以橘皮貝母蘇子枯樓根及仁蓬
砂為麴治積熱痰結

狗寶

狗寶如牛之有黃也第狗性熱其實定是苦溫之物
世人用治噎證以其苦能下泄溫能通行耳又能主
癰疽疔腫同蟾酥腦麝雄黃乳香沒藥等用

簡誤

狗寶性熱善消噎病由於痰及虛寒而得者猶可暫
用取效若因血液衰少以致噎膈者法所當忌世醫
不諳藥理不察病本一槩妄投致病增劇戒之戒之
又凡有脾胃虛弱羸瘦不振之病尤不宜用

山獼陰莖味甘熱無毒主陽虛陰痿精寒

此物出廣之宜州岷峒及南丹州土人號為挿翹其性姪毒山中有此物凡牝獸皆避去獼無偶則抱木而枯媯女春時成羣入山以采物為事獼聞婦人氣必躍來抱之刺骨而入牢不可脫因扼殺之負歸取其陰一枚值金一兩若得抱木死者尤奇貴峒獼甚珍重之私貨出界者罪至死本地亦不常有多偽者試之之法但令婦人摩手極熱取置掌心以氣呵之

趨然而動者為真

羊脛骨

本經無文綱目載其主虛冷勞及脾弱腎虛不能攝
精白濁除濕熱健腰脚固牙齒去黔黧治誤吞銅鐵
金銀等證按名醫別錄云昔漢上張成忠女年七八
歲誤吞金饋子一隻胸膈痛不可忍憂惶無措一銀
匠炒末藥三錢米飲服之次早大便取下叩求其方
乃羊脛灰一物蓋羊脛骨灰可以磨鏡羊頭骨灰可

以消鐵故能治如是之證談野翁亦有此方乃秘妙神效之法也

主治參互

食鑑擦牙固齒羊脛骨灰一兩升麻一兩黃連五錢為末入青鹽和勻日用 聖惠方咽喉骨鯁羊脛骨灰米飲下一錢

蟲魚部

鯁魚膽

此魚最能發濕惟膽能治魚骨鯁及竹木刺誤吞入
喉不出或吞入腹腹中作痛隱隱皆效狀如鱸魚者
是

米穀部

亞麻

即鼈蝨胡麻出兗州威勝軍今陝州亦種之其味甘
氣溫無毒足厥陰經血分藥也厥陰藏血為風木之
臟凡大風瘡癬總厥陰血熱所致甘溫益血而通行

則血自活風自散癘疾疥癩瘡癬俱除矣

主治參互

得漆葉苦參荆芥天門冬生地黃青黛百部白花蛇

何首烏半枝蓮豨薟葉刺蒺藜甘菊花治大麻風

同金銀花連翹單解土茯苓何首烏蒼朮木瓜薏苡

仁生地黄黃芩治濕熱太甚徧身膿窠瘡

粟殼味酸澀微溫無毒

古方治嗽及瀉痢脫肛遺精多用之今人亦效尤輒

用殊為未妥不知咳嗽惟肺虛無火或邪盡嗽不止者用此斂其虛耗之氣若肺家火熱盛與夫風寒外邪未散者誤用則咳愈增而難治瀉痢脫肛由於下久滑脫腸虛不禁遺精由於虛寒滑泄者借其酸澀收斂之氣以固虛脫如腸胃積滯尚多濕熱方熾命門火盛濕熱下流為遺精者誤用之則邪氣無從而泄或腹痛不可當或攻入手足骨節腫痛不能動或遍身發腫或嘔吐不下食或頭面俱腫或精竅閉塞

水道不通變證百出而淹延不起矣可不慎哉

芻子粟味甘平無毒主丹石發動不下食和竹瀝煮作粥食之極美

疏○芻粟其花至有千葉者紅白紫黑色有數種一芻內子凡數千萬粒細如葶藶子而色白本經味甘平無毒蘇頌性寒甘寒除熱解毒下氣和中故主丹石發動不下食及圖經行風氣逐邪熱止反胃去胸中痰滯也

阿芙蓉

罌粟花之津液也罌粟結青苞時午後以大鍼刺其外面青皮勿損裏面硬皮或三五處次早津出以竹刀刮取入磁器陰乾用之其氣味與粟殼相同而此則止痢之功尤勝故小兒痘瘡行漿時泄瀉不止用五釐至一分未有不愈他藥莫逮也

綠豆粉甘涼無毒主解諸熱益氣解酒食諸毒治發背癰瘡腫及湯火傷灼

疏○菜豆粉所稟氣味與菜豆同故能解諸熱及酒
食毒湯火傷灼也發背癰疽瘡腫皆熱毒所致甘寒
解陽明之熱則毒氣不至犯胃而嘔惡腸胃清涼而
諸腫散矣熱傷氣除熱故能益氣也

主治參互

李嗣立外科精要護心散又名內托散乳香萬全散
凡有疽疾一日至十三日內宜連進十餘服方免變
證使毒氣出外服之稍遲毒氣內攻漸生嘔吐或鼻

生瘡菌不食即危矣四五日亦宜間服之用真菘豆粉一兩乳香半兩燈心同研和勻以生甘草煎濃湯調下一錢時時呷之若毒氣衝心有嘔逆之證大宜服此蓋菘豆壓熟下氣消腫解毒乳香消諸癰腫毒服至一兩則香徹瘡孔中真聖藥也一方有丹砂二錢半 衛生易簡解砒石毒菘豆寒水石等分以藍汁調服三五錢 又方夏月痲瘡菘豆粉二兩滑石一兩和勻撲之一方加蛤粉 生生編杖瘡疼痛菘

豆粉炒研以雞子白和塗之妙 澹寮方打撲傷損
用菜豆粉炒紫色新汲水調傅以杉木皮縛定其效
如神

菜豆皮能解熱毒退目翳直指方通神散治斑痘後
目生翳用菜豆皮甘菊花穀精草等分為末每服一
錢以乾柿餅一枚粟米泔一盞同煮乾食柿日三服
淺者五七日見效遠者半月見效

簡誤

菽豆粉性涼脾胃虛寒易泄者勿多食

豌豆

即今之小豌豆也一名胡豆陳藏器云煮食治消渴
孫思邈治寒熱熱中吐逆泄痢及脹滿利小便應是
甘平無毒入脾胃清利除熱之物也又能治癰腫疽
毒牛都御史秘傳四聖丹治小兒痘中有疔或紫黑
而大或黑壞而臭或中有紫線此證十死八九惟此
方點之最妙用豌豆四十九粒燒存性頭髮灰三分

珍珠十四粒研為末以油燕脂同杵成膏先以簪挑
疔破啞去惡血以少許點之即時變紅活色 千金
外臺洗面澡頭方盛用畢豆麩取其白膩去黥黥令
人光澤也

蠶豆

味甘微辛無毒能厚腸胃和臟腑萬表積善堂方言
一女子誤吞鍼入腹諸醫不能治一人教令煮蠶豆
同韭菜食之鍼自大便同出今人有誤吞金銀物者

用之皆效實救急之良方也

豇豆


味甘鹹平無毒補腎健胃與諸疾無禁可常食之昔
盧廉夫教人補腎氣每日空心煮豇豆入鹽少許食
之甚效

刀豆子

原闕

紅麴

原闕



神農本草經疏卷三十